

摘藻堂四庫全書薈要

集部

欽定四庫全書薈要

集部

端明集卷

三十三  
三十二

詳校官助教臣常循



欽定四庫全書薈要卷一萬四千五百三十


集部

端明集卷三十

宋 蔡襄 撰

啓

謝知制誥啓

 伏蒙聖恩授前件職者入贊訓辭冒華於天獎旋

躋禁近假器於人微賁榮三品之章釐正五花之判乾坤涵覆輪奐登收謬恩莫回覲處為懼切以聯視北門之草唐循四禁之防典司內史之書周先八枋之重陪

正朝之樂酒扈威路之喜游振職事之經居中可作集  
右文之治精選匪輕國家總神轡以馭方濬皇源而圖  
治震于諸福格乃大和遴延英絢之資輔益聖神之聽  
處則裁號令之溫麗進則條科指之通行以故書渾渾  
而繼虞朝穆穆而踰漢自匪國器稱乎高雅士林推乎  
純深學善詩經文諧律呂則何以奉行策命之密前望  
光景之嚴類常揀求奚取叨越如某者結髮並進濫中  
下藩賴天時明有祿親逮食畫墁者無望於三釜安檣

榆者自足於一枝旋給筆於中宸得盈篇於燥吻重以  
隨牒一官之禡策名十載之淹狂簡成章僅就小能之  
枝氈氈不舞幾貽真賞之羞濫及英游已虞過任進曬  
牙籤之盛虛鳴璫玉之長以至承諫署之缺員預王闡  
之記事樸遯補過冥煩忘勞丐使節以去邦泣父書而  
銜蓼養堂所倚僅求唵喘之餘祥弁亟更還宿編摩之  
舊茲承命召番掌制綸不能追昭文之坦明徒亦伸筭  
服之安燠矧復寧平攷實峻譽比肩皇麟在園之儀儀

元鳳覽輝之翽翽遽收材謫深獎寵多斯蓋伏遇某人  
發澤真誠推轂寒素恤稀遷之末迹懋樂育之深仁過  
私華衮之褒濡及春天之潤敢不恪脩志介勗濟官成  
勤磐石之細書勉鉛刀之近用是圖報上無玷與人

杭州謝兩府啓

右某奉勅差知杭州軍州事已於今月二十六日赴任  
訖刻奏陳情幸諧於前命自中易外獲領於便藩切念  
某學術迂疎器能樸陋蚤際重熙之旦寢階膺仕之榮

徒知執節以致忠不能應機而趨務歲月持久寵光益  
蕃雖要職之屢更顧微勤之靡効間以親闈之養懇辭  
計省之勞旋改近班俾分外鎮矧東南之興壤號繁劇  
之名都遂其夙心實亦優寄此蓋伏遇某人協和元化  
俯徇物情議論繫乎重輕任使均其勞逸敢不益堅素  
守勉布寬條上酬覆露之仁次答陶鎔之力

回韓舍人啓

右某啓伏審祇奉寵章進司明命伏惟歡慶切以朝家

百化整整萬官林林曰重與輕自內而外況直星垣之  
祕處天禁之嚴文章之所本原號令之所基始鼓萬方  
之動莫尚乎辭宰三代之英以至于道號為清貫屬在  
元英伏以某人德粹行方學老文鉅為之典策可施廊  
廟之崇語以名聲宜冠公卿之重歷登臚仕常邇清光  
遽陞秩於春華遂試才於翰墨旋繇官邸密謹宸趨二  
螭之坳既重史職四禁之祕復典詞林以仕論之居高  
故褒章之特異擢名近

闕

珍羣敷天下之言一還於



深厚遞省中之直猶出於嚴凝矧復通國政之論思自上心之東注若夫台望繇此階升承禮意之相先辱賤脩之來貺感銘無既交萃衿膺

回賢良李祕書啓

右某啓伏審奉方聞之語寘絕異之科寵榮

闕

駭羣

聽切以朝廷考百化之統究萬物之源內則叅和於廟堂外則博訪於郡國尚慮疑異之至有幽而難曉經綸之術有鬱而未通乃於簪紱猷畝之間起策謀文學之

士俾造便座極陳昌辭指朝端之紀綱論天下之利害  
上切親覽弼成化功伏以賢良祕書學該天人識洞今  
古聲華溢于韶夏行實粹於璆琳練達經權講通治亂  
賈誼宣室深對於所然平津太常首承於召見脩程伊  
始親議所歸方拭目以想聞遽裂牋而見授情文甚厚  
衰拙何勝永光篋笥之藏愧乏瓊瑤之報

回賢良范祕丞啓

右某啓伏審入造明庭恭承大問擢陞異等光駭衆聞

伏以賢良祕丞學臻本原言有閭域精識萬變深天人  
之交大名一飛在日月之下以久大自處而不習章句  
以功業自期而好譚經綸賈揚之鴻藻何多晁董之芳  
蕤盡在頓自上心思啓沃之論深詔執事舉方聞之賢  
薦書適遠於九閭俊譽已交於多士程文禁閣竝厠於  
羣英奉對宸儀超躋於上第龍階尺木之翼鵬漸南溟  
之圖號為得人丁此盛旦猥承大軸之貺首講好言之  
勤在於疎涼非所宜稱愧乏瓊瑤之報但光篋笥之藏

泉州回交代啓

卷三十

膺命遙藩交龜視事否德踰爵無裨漢詔之嚴善政告  
新幸服蕭規之誨喜及瓜而為代傷折柳以贈行詣闕  
旌軒淹致堯而有素攀轅父老思借寇以無階促祖禮  
之空疎賸思心之愧結去德未移於旬浹因風頻寄於  
年華敢圖謙矩之光加有公極之賜巽辭溫密誠虛長  
者之懷褒指勤能似重宵人之過永言佩刻迥異等常  
顧水驛之阻脩逼年籥之適暮勉祈寶畫前拜寵靈禱

系之私剝濡曷既

賀文相公樞使啓

竊審拜恩宸闕正位樞庭伏惟歡慶恭惟樞密相公望  
重本朝聲加殊俗抱夔龍明允之業會堯舜光華之辰  
忠言嘉謀盡上前之啓沃入輔出帥繫天下之安危四  
方于宣二府更踐上方尊任舊德圖迴太平委大柄於  
機衡運深籌於帷幄雖本兵之地載副於具瞻而當軸  
之司實勝於重任某聳聞成命增抃鄙悰恨守外藩阻

移宗屏

回秦州知府錢端明啓

泣官東周無日暇給引領西屏若天阻遙勤企讌游積  
深悰恟久稽寒暑之間懼黷高明之威忽辱眷私遠煩  
禮訊竊惟節制方面奠安藩維神明擁全戩穀來相伏  
惟某官識通聖奧德重坤元行業幾于古人經藝純於  
當世光映朝列簡在宸衷延登書殿之崇總統麟符之  
重敢冀副上之睠御生以和茲用感藏豈勝譚悉

省主端明韓侍郎啓

伏審祇奉制書總司計籍伏惟慶慰恭以某官至誠格  
物奠學際天飛步書林文采昭於羣聽正冠憲府風聲  
凜乎四方厭從事物之勞繼得藩宣之請化行右蜀入  
尹上京理狀亟聞帝衷彌簡領縣官之經費尚屈周才  
代天工而變調佇諧僉議某屬嬰官守阻筵賓除抃蹈  
茲深名言罔既

呂樞密啓

伏審顯膺中旨榮貳內樞伏惟慶慰恭惟某官資以天  
高美由世濟親觀亨嘉之會自祈睿聖之知材用之全  
所臨心最禁嚴之選其歷殆周繇右蜀之召還領中都  
之經費上心已簡師錫攸歸籌幄深嚴已叅於坐論國  
鈞繁委即應於具瞻某限守藩方阻趨賓屏側聆渙號  
徒忝深衷

回校勘孫學士啓

伏審被命宸庭升榮文館伏惟懼慶國家纂襲慶緒網



羅執文惟名號之浩繁重簡編之舛缺旁求時彥增置  
舊員豈徒正錄略之訛蓋亦廣賢才之育校勘學士業  
履尤異名稱甚隆向在先朝首當高選緝羽陵之紛蠹  
覲金匱之幽藏歷日居多疇庸果茂先貽啓幅數叙榮  
期感抃之深名言罔既

賀李太尉啓

竊審榮加使節出鎮侯藩明命載傳僉圖允協恭以知  
府太尉長才經遠敏識通微世濟美於大忠家聯華於

近侍蚤更中外之寄夙藹縉紳之稱吳國撫封久思於  
留務漢壇授將初建於齊牙仍殿重邦併光優渥元戎  
十乘已宣連帥之威泰階六符即正熒煌之座方聞殊  
拜增抃鄙懷其諸瞻祈難以文諭

回知瀛州知府待制啓

言念竊便藩之寄越在天隅瞻帥聞之嚴忱如霄極惟  
神交之留念煩手記以相先宛然成章永以為好伏以  
某人以道自鎮與時會亨進更臺閣之游積有朝廷之

望維北道之分邊防且嚴重天之威兵制盡在況直雲  
章之祕方司武律之崇併授權綱用清氛稷行促追鋒  
之召入持造物之鈞冀保興居庸符公望

判府相公問候啓

近以國家載煩舊德專鎮大邦阻窺上衮之嚴莫造翹  
材之盛明神薦祐景福如歸伏以某官大方無倪全德  
若隱武公之政宜在國人文子之勲復刊盟府然且解  
魁衡之務重屏翰之權孟津三門已給甘棠之愛豳詩

七月載歌零雨之思庸副具瞻大庇羣品敢祝為上毗  
倚精調寢興私所禱祈坐勞懇悃

回慶州經略觀文孫侍郎啓

伏審就膺詔書移奠侯服夙叨獎顧不無懼心恭惟某  
官推誠在民以道結主出處聳當世之耳目議論繫本  
朝之紀綱故日月之光得以明其義雷霆之下不能移  
其忠上以天下之雄時惟關中之會維周之翰申伯偃  
藩自陝以西召公作帥然考來今之制此為元宰之基

納願兼常治書見貺意非詞盡感與抃俱

回秦州密學侍郎啓

伏審外改使符西鎮侯服斗樞進直朝望增榮伏以某  
官性明而誠體靜以正中外共仰聖神所思頃繇司牧  
之卿進拜綠圖之府出持漕節曾未歲辰上惟秦谷之  
雄前控戎庭之會特煩鎮撫用遏披猖總提數道之兵  
大建一方之政茲實巖廊之漸允符薦笏之言致慶未  
遑流書見枉感銘抃系交萃悃悃

回河東都運孫侍郎啓

伏審肅拜制函進陞書殿地兼權重才與望并伏惟某  
官體被中和德含方重露賢才而特起會聖旦之重雍  
向領帥垣翹專方面上以大鹵之與部天驕之接疆輸  
轉至煩調度頗急足兵足食將仰於周才為龍為光豈  
量於後拜何期冲抑遽辱飛牋謹於置藏永以為好

賀運判啓

伏審顯膺渙綍出貳均輸爰擇剛辰以諧上禮伏惟慶

慰伏以某官秉心醇粹植操清夷早邁休期荐更寵數  
主府佐治方成刺部之猷蕩節宣威爰假工商之畫矧  
惟下車俯邇投刃皆虛暫資強富之謀即奉清閒之譔  
叨分寄任始喜同官抃躍之誠剡削無論

回賀編校丁學士啓

伏審榮拜王言進居文職且賢者器業已為人之所知  
而朝之公卿繇此途而登用伏以某官學與知鉅德粹  
行方入紬四庫之書深被九重之眷權陞詞館度越珍

羣行居天禁之嚴仰直星垣之祕側聞優拜倍積抃悰  
煩禮意之相先遽賡修之來貺玩詞益感敷叙奚周

觀文侍郎啓

伏審懷避樞衡出專方面進陟天官之貳榮躋書殿之  
華制命傳聞歡頌交慶伏以某官均岳之鎮得坤之元  
簡在聖神踐歷中外本兵之府勞制勝於未形瀕海之  
邦暫均休於共理明詔一出先聲四飛側聽下車即聞  
報政惟恐中途之召促調元鼎之和系詠之深敷宣罔



既

回盧龍圖啓

伏審得請宸廷專制方面號稱東海之表仍寵駟車之  
榮上眷素隆懽頌交慶伏以某官以道結主推心及民  
議論繫本朝之紀綱出處聳士人之觀聽暫解經筵之  
務邊分藩屏之雄齊魯連疆報政不須於朞月勲華當  
寧經邦即賴於謨明會承驛置之來首枉牋修之貺茲  
用感服豈勝究宣

回定州傳密學啓

伏自進直斗樞領府朔屏謀帥之重注意益隆惟幙府  
之初開保靈襟而加謚伏惟某官抱器閎遠逢辰靖嘉  
內外展懃文武惟憲中山屏翰北道襟喉常宿勁兵號  
稱要壤聊護諸將式遏一方矧隣好之締修屬戍防之  
罷警行膺迅召別遲登庸猥荷眷私遠煩音訊曲敦契  
舊倍切感銘

回洪州施刑部啓

近膺中詔出守外藩理舟御以沿流敢稽嚴旨奉親輿  
而至部幸慰慈顏承候置之遠貽辱珍滕之見貺持謙  
自處匪異異牀推美過隆有如華袞此蓋某官之方繇  
器望適統藩垣早者奉朝實託雅游之厚今茲忝寄又  
通隣道之懼尚阻披承倍深感系

回沈郎中啓

側聞優拜上恩往釐外計地兼權重才與望并伏以常  
宿勁兵實最他道率資用調亟委均輸申命數以載隆

總事為而益厚伏以某官周才應務遠識前民乘西洛  
荒歉之餘盡歸經畫奉朔易浩穰之給佇出謀惟由此  
階升別膺柄用願言珍嗇以慰傾凝

回陝西運使蔡司封啓

言念日月靡居悵歲華之易得江關脩阻曾記問之難  
通伏辱郵音特形禮意承按行之多暇擁諸福以假寧  
伏惟某官早逢聖神自奮謀畧沈淵粹美以內富激昂感  
慨以特高矧茲陝服以西號為要地朝廷之任式藉通

才尚希保和別膺隆任

回廣西沈運使啓

向者承祇事

闕

言過敝封暫

闕

臺之重請行甚

闕

結

戀茲深諒安

闕

及時之問眷存良厚感戢增多矧惟

才遠而

缺

能以介臨按遠

闕

所

闕

出車之游召歸嚴

宸

缺

笏之賜願持主術庸副睿詞

衡州國博啓

伏審某官顯膺綸綍出領使麾殿衡岳之名都冠荆湖

之鉅屏徒茲倚重

缺

均勞豈謂特示隆私遠貽芳檢

篤叩勤之雅誨擣葆飾之英辭顧惟露寃之餘無廢高  
壺之樂民俗歸厚已銷南顧之憂堯世疇咨宜備西清  
之問克伸讌集增煥邇班傾頌之懷翹凝更積

陸太傅啓

郵驛相遼聲猷且阻忻聆貳政多所上聞近者猥示榮  
緘備形謙德曲敦獎飾之旨極擣彪緬之辭繹玩于三  
寘藏不減餘杭會屏東浙要封屬當贊治之餘益振批

輒之利坐旌美課行峻榮階歌薰在辰浮瓜阻宴傾企  
之素敷叙奚殫

建州運使曹郎中啓

曩蒞朝班實託雅游之厚洎分郡寄復通隣道之懽猥  
辱注存遠勤禮訊詹言清晤彌切中藏伏以某官適總  
密機夙推時望風生列壤欽抗志之澄清績奏中臺蒙  
褒恩之優渥歆炎方熾會見尚賒系激私銘矜膺交萃

回宮使曹相公啓

竊藩垣之便越在遠方瞻門戟之嚴悅無虛日承抑宰  
衡之體時頒使驛之書諒惟拱揖太和介受景福伏以  
某官膺時間傑與國純忠在環衛之崇尤號敦固加戚  
里之近最為賢明更冀對時之休御生以道匪私勤禱  
抑衆具瞻

回唐龍圖啓

伏以延閣疏榮高牙開府控洮河之種落握大鹵之師  
屯節制森嚴表儀體重典常伊始傾柝尤深伏以某官



盛德鎮時嘉名拂世忠義所激高視於古人權任所專  
威流於異域遠煩禮訊欽荷謙光感篆欣瞻併嚴悃悞  
謝隣州知通啓

近膺中旨出守近藩瞻言篤信之邦俯出經塗之地荐  
呼趨而往駕陪捉塵以聞譚述念眷私實懷感著屬茲  
視事之始早稽剡牘之儀緬惟首夏清和惠條寬肅處  
於餘裕固練神而有方給布懼謳行辦裝而趣召

杭州侍讀啓

鄉者赴治鄱州借途上府洊瞻姿望特荷獎延置酒宴  
堂屢齒下座解維容艦旋遠重門領職伊初望風寢阻  
恭惟靜鎮居叶淑祥伏以某官內閣元臣禁林舊德簡  
侯分閫聊福斯民曹叅治裝行須大位伏冀上為明盛  
善保粹真

建州林書記啓

言念雖處僻郡多謝來賓人豈慕於生芻禮敢忘於瓠  
葉賞心樂事幸可備於良辰旨酒嘉肴絕將意於君子

尋以睽判慙無宴歡豈謂惠書過承雅好但捧味而無  
數卜款會之未期更冀珍調以需光寵

回賀劉祕監啓

伏承拜命為藩涓辰立政何撫封之在始特貽教以相  
先禮意曲隆銘言不既矧惟踐歷華貫徊翔盛時九寺  
近班最重蘭臺之長四明要地適分竹使之符行聽政  
成別膺詔委連名部署實假隣光尚冀珍調少慰傾想  
回知太平州李郎中啓

外塵薄服勉奉官成雖維一隅距更數舍積有闕齋之  
戀僅稽驛闕之行敢從順風獲此來教如奉燕集諄諄  
所譚抑聞寢興簡簡其福既感且抃非言可窮矧著幹  
聲之聞將結主知之厚冀精道味以蹈天和

回新嘉禾知郡郎中啓

曩聞被命未遑馳一介以舉書徒切傾風不啻逾三秋  
而結想忽詒汗竹之訊審赴及瓜之期甫通晤言預深  
抃幸矧惟領劇藩之久次踐華省之上游竚報政成更

比齊侯之速別膺大寵旋觀漢札之飛餘冀珍調庸符  
詹詠

錢舍人問候啓

言念川陸差遠信郵僅踈虹蜺之光適此東望金玉之  
問遽然南來損抑載深感服良厚伏以某官文鉅且粹  
行高而純道靡緇磷溫其美玉之潤心無枉撓淵然止  
水之明行奉節騶復陞詞掖冀精道味以永天和

端明集卷三十

欽定四庫全書薈要卷一萬四千五百三十一

集部

端明集卷三十一

宋蔡襄撰

啓

賀兩府正啓

伏以元者氣之始惟君體元而謹時正者天所微惟臣奉微而嚮福恭以某官自天精粹與聖會亨講明密勿之謀修潤太平之業變順陰陽之著以輔乾坤道迎邦國之祥用安社稷神靈所祐景貺如歸某限守侯藩阻



趨材館

賀王密學正

伏以歲更其次起王道之端律生於陽為人事之紀伏  
維某官累德高厚對時靖嘉坐宣方面之風積著斯民  
之惠踐迎首序翕受繁禧旦暮詔音光華柄用未繇慶  
謁徒切頌祈

賀發運提轉正啓

伏以人時謹法視太始以為元王政更端奉三微而建



統伏惟某官周才應務遠識前民出按方維稔聞於最  
目入趨宸宇欽奉於休恩踐履歲元膺受福嘏慶頌之  
切敷叙奚殫

又

伏以律生有元氣復其本與時偕長惟道所存伏惟某  
官業履清修才靈敏給居集按臨之効佇膺懋賞之書  
羣陰既消諸福如召良深祝頌安可究宣

回知通賀正啓

伏以損益相參消長云變斯見天陽之漸以為君道之  
元況德名之講聞固方穀之來助會馳介紹垂貺賡修  
載窺巨麗之辭過執謙虛之意良深感戴安既諭云

賀昭文相公冬啓

伏以斗柄建子叶萬寶之始萌緹筦生陽慶一爻之來  
復恭惟某官代天理物輔世長民坐調元化之工力助  
聖時之祐履茲令序密擁繁禧某限守侯藩阻趨鈴閣  
云

云

賀集賢相公冬啓

伏以推日于天起牛宿之一度驗氣以律生復卦之七分恭惟某官同秉國平密調物理助成神化之妙致協聖時之和踐茲令辰叢厥休祉某限居藩守阻造鈴齋云

賀歐陽侍郎冬啓

伏以斗直於子律旋於宮陰以利而羣佞消陽始復而君子長恭惟某官夙謨九德叅理萬機屬庶彙之將萌

慶大賢之受祉履時長至與國同休某限守候藩阻趨

材館

云

賀叅政趙侍郎冬啓

伏以日至極南晝移伊短迺天陽求復之始實君子履  
長之初恭惟某官職佐萬機位叅四輔助權造物之柄  
協贊代天之工適丁慶辰茂膺殊祉某限分侯屏阻詣

鈴齋

云

賀樞密侍郎冬啓

伏以日躔牛斗氣正虛危仰觀運之迭移俯迎時之長  
至恭惟某官腹心社稷柱石廟朝雍容宥密之司提振  
樞機之務惟時格祐與國迺衡某適領侯符遙瞻鈴閣  
云  
云

賀胡副樞冬啓

伏以羲經復象一陽來子位之初太玄首辭萬物奮黃  
宮之下恭惟某官華國重器覺民真儒職叅樞極之聯  
力奮經綸之効踐迎長日倍擁繁禧某假守海隅阻對

台席

云

賀呂副樞冬啓

伏以一陽來復慶君子之道亨萬物潛萌協天元之序  
正恭惟某官本朝耆德當世鉅賢發相門之長才贊樞  
府之要務順迎令序坐擁純禧某屬守候封阻趨賓閤

云

云

賀陳副樞冬啓

伏以乾文仰察日居玄極之躔律筦下旋候應黃鍾之

氣恭惟某官才隆時棟忠結主心贊樞近之繁機舒弼  
諧之素蘊適丁長至翕受寵禧某限剖侯符阻遙台席  
回翰林學士攀違啓

近由分虎之行嘗展登龍之別東門縱綽方悵隔於清  
班西掖演綸遽寵貽於珍翰重形離仇益動黯消感戀  
所深敷揚曷既

回吉州李殿丞啓

地處海隅路賒江表徒飫聽於善政曾曠問於飛郵何

雅故之弗忘遽函封而垂錫繹披縉旨恍接名談仍聞  
坐鎮之餘洽播袴襦之詠抗懷獨運嚮福均濡庾伏尚  
留讌期尤阻逖惟舊好紛集榮懷

回張學士啓

言念契闊風期差池歲序適臨便郡俯接提封才安所  
治之居遽得及時之問眷存良厚感服自深伏以某官  
業履弼中才紹經遠外專利柄方司臺部之權上簡帝  
心行踐禁林之選願持主術庸副睿詞



回謝提刑啓

肅奉帝俞獲司藩政會即封之伊始於上記以未遑敢  
惟講好之勤首辱貽書之貺詞與意厚感將愧并恭以  
某官席美朝紳主平邦憲自奉光華之使益宣欽恤之  
刑行奏異能別都顯任未前披覲徒切瞻祈

回潤州章郎中啓

審奉朝綸榮紆郡紱領一都之會風望匪輕控大江之  
衝事權尤重疆場密接翰牘先詔蒙潤居多輔車有賴

伏以某官性資兼敏材識淹通盤錯著能荐委于蕃之  
寄都俞即協別疏不次之恩會見末由係瞻徒切

回蔡運判啓

近荷優除忝臨要地雲霄在望孤奉於明綸翰牘流徽  
遠詒於慶問恭惟貳漕臺之優寄分部刺之劇權百城  
望風萬里迎刃吁寵函之訊召即禁省以陞榮系詠感  
銘衿膺叅萃

回賀新提刑元郎中啓

伏審就奉詔書移按獄事伏惟歡慶恭以某官懿文景  
行亮節冲規早膺郎選之華出布藩條之重休聲既著  
至簡於宸心中具有常遂專於使旨方依臺部式忤  
悰先枉箋修倍深感系

與曹司封啓

自遠規猷動更晦朔仰思確論鎮極勞懷屬春令之方  
中納天倪而見順恭以某官忘幾沈略樂道養恬都捐  
冠冕之榮深得煙霞之趣內量汎務企服高風卜披會

之未期但凝瞻而增劇

回茂才投贄啓

數日前伏蒙猥示長牋兼詒盛制文意高古橫述作之  
宏規辭旨冲謙隆進趨之妙矩再量膺闕詎測淵涯唯  
阻觀於英儀但永銘於珍蘊其為感荷罔悉名言

回兩浙運使學士啓

近膺寵詔出布寬條夙戒舟虞已亂長江之阻前瞻臺  
部方依大府之嚴敢謂惇明未忘契分先垂尺牘之沉

遠置行郵之來窺繹藻辭倍增銘鏤即接承於高論罔  
究述於鄙悰

回睦州李虞部啓

審涓剛辰榮諧美任古治中之職郡之紀綱半刺史之  
權事皆闕決矧郎官之充選方士望之推高行遲政成  
別膺登課猥承隆眷特貺珍題感篆欣詹敷染奚盡

回發運張學士啓

瞻轉漕之崇遠依屬部通信問之缺已期順風遽辱牋

修之來特存禮好之厚茲用感服豈勝究宣切惟行方而純文鉅且粹入奉禁籙不違清光對閱書筠率判款緒別膺寵數更踐榮階

回越州教授吳祕校啓

一水相望長牋遠貺鳴玉鏘金而盡在布錦列綺以何多載窺鉅麗之辭徒切置藏之厚矧惟學術該洽素有淵源行實清修頗知趣向祈克全於禮制將別漸於亨塗餘在詹凝安可云諭

回新知越州章學士啓

審被俞音出司藩政眷是會稽之重號為百粵之雄擊  
析交聞方喜疆場之接飛郵遽及俄承罕牘之貽翹俟  
仙舟併親餘論感銘抃系參萃悃悰

回提舉慈孝寺李左藏啓

近荷優除忝司善郡奉親輿而至部方幸便安布寬詔  
以臨民敢辜付委猥承雅眷遠枉珍珍矚密侍於天光  
久著稱於材武願言加嗇庸副翹瞻

回高崇班啓

自遠堯庭遽臨吳會屬事為之倥偬憑郵置以闊稀俄  
辱園函曲敦雅眷矧日趨於朝謁惟密侍於天光宜保  
祥經聿迎戢穀勉希將重別迓寵陞

回湖州知郡徐郎中得替啓

伏審膺十行之札榮被代還奉三年之成旋登課最矧  
雪溪之雅俗擁吳會之故墟耳剽風聲頗光朝選辱珍  
題之見貺詠厚意之周勤披晤匪遙敷叙奚既



回賀張皇城啓

伏審被命出麾涓辰頒政伏惟歡慶恭惟某官起於將  
閥舉有賢才用金板之謀屢專武事奉牙璋之寄更重  
邊威帝念且深軍聲自樂遠煩牋翰能不置藏餘冀保  
綏以副言願

回謝知通啓

比膺俞旨出領便藩屬總事之云勞媿馳書之未逮敢  
惟勤誼特枉誨封講好甚勤玩詞增感矧長才之濟務

方美任以逢時宜航大和前對光寵

回蔡郎中啓

得郡海瀕望風天角高才景行役懷想以徒深善政仁  
聲播傳聞而已久行膺甄擢別對寵光遠辱珍賻過形  
厚意感藏無數數染奚周

牋

謝昭文張相公牋

某幼而從學少長舉進士作詞章日益務奇新與時等

輩爭聲名當時處之無所愧也數年以來專於聖人書  
更求其意少有得焉儲於心而力於躬其於為文不復  
奮肆夸麗通乎意則已要之是莫敢有所至焉然勇於  
進而不能自視度其性之與力堪否貿然冥行而不知  
止既而翻然省其中昔之處而無愧者今也愧日益加  
矣以愧心之加然後能自信乎有意於古者也有意於  
古則莫能與今盡同也今之學文章者或屬聯簡編挾  
持以趨大人之門祈倡一言得名譽加衆人上取顯重

於當世及臨政官民則曰吾業者文章吏事吾無與也  
謾不肯省視案牘以自為高俗亦莫之恠而反指其人  
曰某文章士責以材用不為宜也嗚呼所謂文章者豈  
期為速進之資耶又豈不與民政異耶是必不然是必  
為之皆偷者也然則其尤能於文章愈不宜為此況某  
之不能孰敢務取名而怠事者哉前居幕下踰一年矣  
苟非承命及因論列事則不敢以文詞妄進於左右日  
與羣吏口語辨是非當否非其休未嘗執書自娛如是

非故求異於人庶乎其中之愧者鮮矣伏蒙昭文相公  
不以某拙愚為棄而以某藝文操履言於上者聞命愧  
畏莫知止極伏惟相公有國元老天子所賴官師所則  
四方所瞻誠得天下之賢者布列朝廷條理制作大備  
太平之事某也材薄能細得與士大夫之後以觀其盛  
美而作為歌頌播於遠俗而傳於後世其心亦足樂矣  
豈敢以區區之身徼幸於宰相之門哉是其所樂者思  
與天下之人同其所樂也

別紙

曹待制

某啓別後計君侯浮潁亂淮自冬瀕春道路之勞加以  
吳閩從舟上下湍險復可怖恐是行良苦然既至則溪  
山城郭署居食飲丹荔夏熟雜花秋香雖天下佳處當  
不能過之矣士人有深明經術敦尚節行間暇與語大  
醒人意始朝廷遣君有經制久遠之議度君至部或與  
遂成之則一方幸甚南地多熱君侯愛重三月二十二

日不宣某頓首

黃太傅

久不作書無他蓋無事不須縷縷承示及已言之有南  
來人奉詢多言足下太寬而少嚴雖字人者當然其如  
鄉中詞訟若狡者不禁則無理者妄作故是是非非懲  
之恕之乃可為政若用寬仁事益繁而難精不可不察  
某頓首

觀文侍郎

某啓奉公書伏承慶侍外起居萬福知憂撓多端情悰  
不聊幸寬中人生最深者惟愛耳至於材處萬事不為  
物役賢知皆及之愛則未能逃之者蓋於是而生滅安  
可逃哉然知其無可奈何就日月漸遣之憂思傷人無  
形願省覽不宣某再拜

歐陽永叔

某再拜嘗已拜違伏蒙賜手牘展繹荷戢波流雖云未  
增載輕可行少候舟人辦治便即解去浩然之心壯年



尚能持習今老矣復何繫哉無入而不自得唯恐智短  
而道遠求之行之沒世而後已佳山水美魚稻我自有  
之而樂孰能禦哉承教固知有見慕之懷何可得也謹  
奉手啓上謝不一一某再拜

元郎中

君得武陽待次錢塘予為郡守自寒食遊西湖入靈隱  
天竺穀雨賞花過吉祥龍華淨明及民間園館往往傳  
於篇詠誠可娛也君將之官予亦被命南都雖未及符

計非久留異時聚集非復有此臨書益自惆悵耳

陳祕書

某啟自外除後宿疾未痊心意不聊辱書并近文數十  
首枕上窮卷不知筋骸之攣苦子之文詞日益新道義  
亦隨而有加焉其有未至者當相見日評是非缺之  
論則今世未嘗有定分某則不暇為此某答

答戶曹葉君

十一月十二日某頓首頓首比聞足下有閩中之憂方

執喪在疚禮不得弔又以聞之過時不果修問為重要  
今奉書以某撰次先文表誌勤勤為謝某嘗以為文者  
當有典法言之於今而見者可信傳之於後而聞者無  
疑是曰文已自惟所作不逮前人故論述功德以稱當  
世之士大夫者莫敢當也足下以里中之舊頃以見命  
雖復編次事實第不能贊發賢者之光而充滿孝思之  
志用是為愧足下過懷謙抑為意醇厚殊非望也惶悚  
惶悚冬寒幸飲食自壽蔡某頓首

提刑方郎中

某啓蒙教精密見望殊深然某久處繁劇五年之間無一日不在思慮之內以是神明自耗不獨筋力之難勝也雖得錢塘而多事甚非自適之所豈暇作區區事耶目前遣了以免官責而已儻一日得自遂乃天幸也因風示誨不一一某上

知郡陳駕部

某啓輦轂之下號為勞勞况茲計省罔有暇日退休宿

客續續無窮至或親知不暇交言而去朝車臨訪無緣  
從容今茲出守復爾睽闊瞻馳之素豈勝鬱邑謹奉手  
啓叙別不一某頓首

彥猷學士

十一月十一日某再拜賢弟殿中君雖同年而未嘗接  
識至京又不往還但有見君子多或稱之前月十九當  
直後殿輒見其作為動搖山嶽雷霆之下挺然不動遂  
得春州之行斯大可嘆駭前史所載古人事豈復能過

之耶惜其不幸所論不從而身竄窮荒愧恨何極近有  
勅旨減放三州身丁米斯聖情哀憐遠民之深故有是  
舉今歲都下大寒非常近登陞首問員小茗造作之因  
殊稱珍好恐知兩日前堂中下進奏取江西及福建赴  
治月日後逼節未有聞不知作何行當是別有命耳夜  
寒筆凍揮灑縱橫願君侯恕之蔡某再拜

端明集卷三十一

欽定四庫全書薈要卷一萬四千五百三十二

集部

端明集卷三十二

宋 蔡襄 撰

齋文

南郊道場讚佛文

伏以講盛禮於泰壇用伸嚴事集勝因於淨土宜運洪  
仁伏惟皇帝陛下順法乾坤祇奉祖考萬物涵仁而生  
息庶政蹈道以中和甫屆書雲之辰往陳奠璧之祀特  
開精舍廣肅法筵展龍藏之秘言揚魚山之清梵庶敷



善利胥協熙辰今皇帝伏願臨吉土以升煙高凝祥氣  
御端闈而洒澤下格幽途永孚環海之心益固南山之  
壽

功德疏

奠玉紫壇虔修於大報布金紺宇祇仰於能仁用集妙  
因特嚴法供皇帝陛下與天均覆惟日並明運神化以  
無方置幅員之安處甫臨至景專講上儀就吉位以薦  
誠霈渙恩而澤下有來清侶敷誦秘文式賴殊緣宜資



熙事伏願五辰協序百福凝祥永隆久大之基益固延  
鴻之筭

順祖惠元皇帝齋文

豳風流頌陳基業之艱難梵澤垂文降福祥之孚格諱  
辰甫及妙果宜憑伏惟順祖惠元皇帝蘊神聖之資累  
元功之茂詒孫謀而及遠啓天命之來符今皇帝奉清  
明之宮薦馨香之德敬仁祠之淨土翻文佛之秘詮順  
祖惠元皇帝伏願並真淨高臨覺地集祥繇緒敷貺

羣靈今皇帝伏願鴻筭後天至慈冒世萬寓輳於朴厚  
四極格於混同然後願台輔協恭宗圖繁衍日星順夫  
軌道泰稷滋於有年舉是含生悉登壽域

太宗皇帝忌文

至大之德列原廟以推尊無量之仁依覺皇而薦祐太  
宗皇帝恩綸四外運紹再傳化治之光在人昌明之慶  
垂世今皇帝永思先烈濬發精神有來淨行之流聿修  
秘藏之妙太宗皇帝伏願超游真蓋廣覆羣靈慧如日

之圓明化等空而常寂今皇帝伏願壽年山固聲教天  
臨儲嗣寢蕃宗支彌盛宰路協恭而贊輔霄躔應候而  
泰和五辰順時百嘉遂性

章穆皇后忌文

伏以蕙車風逝杳仙迹以曷追竺館載虔仗佛因而申  
薦恭惟章穆皇后稟靈魏麓作儷周京修陰教以輔隆  
正坤儀而中肅真游彌遠靈德逾芳今皇帝孝軫至懷  
慕存遺懿茲復臨於諱日爰肅啟於法筵用植勝緣以

昭嚴奉皇后伏願棲遊淨界超證真乘備福德之莊嚴  
會天人之利樂皇帝伏願運延星劫位固寶圖暢聲教  
於八遐戢干戈於四裔然後願盤維敦茂永弼宣和百  
工罄述職之勤庶績協順時之治若夷若夏有性有生  
率躋仁壽之期共洽羲軒之化

章獻皇后忌文

保佑帝尊上繫於慈訓追懷親愛虔託於能仁皇太后  
惠澤多方教流中間迭奉母儀之重再嚴廟象之崇今

皇帝孝德因心諱憂在旦軫瞻此之深念集給園之勝  
因皇太后性周大空化通妙力護生靈於至樂福基業  
之無窮今皇帝鴻筭後天深仁被物殊俗格乎面內庶  
品遂於陽中台哲同寅宗藩協輔武皮包乎犀利文象  
蹈於經常有生之繁惟帝斯賴

賦

士伸知己賦

古有云賤而達已者道必有裕貴而得士者禮必與鈞

意闕榮以高世竭游名於大人威鳳下而覽德微蠖屈  
而求伸謂周公多才揮沐吐食而延白屋顏子具聖砥  
名厲行而附青雲故我氣浩集義遊於天真默守節而  
無悶動會時而益振彬文薄乎河漢長筭驚乎臣隣指  
素絃而稟潔紉香草兮生春彼美君子風度瑰偉烏在  
其蔓葛以均戚寧藉乎樹粉而接里夷廉疑而素言誼  
幽眇而鈞旨判柔植於異畦決斷涇於東水始傾崑而  
娛玩遽倒廩而矜侈耽聖域以同輿秩皇塗而並軌雖

韜瑕可以取璧兼體可以收菲矧或太公蛻北海之居  
安石翔東山而起我拒其歸誰執茲恥必使右雪苑之  
蓆屣繡衣之履繩引堯舜以致君蒙合燕趙之多士苟  
氣協而聲同偕克濟乎薰美者也且夫虹玉隱乎巉石  
玳珠淪乎層漪麒麟非犬馬之比鱣鰔豈螻蟻之持沔  
明淵而自得曷悚迫而外移華屋千椽柔荑百枚積粟  
乎京坻躍馬乎駟驪匪衷藏之雅尚差得志而弗為何  
蘊謏以發顏何挾巧而譎辭宜乎厚德表世嘉聞蓋時

身享崇高之貴瞻咫尺之儀謂朽株可萬乘之器廊廟  
非一木之枝得于道不伐乎衆公推于室不憎乎內私  
舉巖穴而悚觀我冠佩而來思上弗求焉無曰蔑當吾  
取下弗進焉無曰胡為我知然則人之膠于今者或安  
于近泥乎古者或昧乎通擇其粉墨之異考以宮商之  
同射乃墉上宜乎日中鳴鶴陰而子和雕虎嘯而生風  
不然則名位相雄師學相攻耕石田而待稔懷珍髦而  
適戎故非五難而吐論和再刖而處窮嗟乎木秀林而



必摧士入朝而見嫉絳灌隱堤而賈遷椒蘭發機而原  
黜子冉膏舌而墨幽臧倉園精而軻逸夜光明月招訶  
按劔之年流水高山沈思絕絃之日在孤見之卓越發  
羣蔽之豐密借如說困刑戮何擷其芳尹恬耔耨何鋪  
其香若歲旱而澤及卒阿衡而自將惟聖睿之親逢俾  
業履之倚昌奚仕虞而弭廢由自我而虜亡秦何售之  
而遂用遽厚之而遐疆仲負努而仇君鮑何奪徽繆與  
鋒鏑弗芥蠱乎左右麾干侯而拱天王設隕越於九淵

幾夷衽而易鄉甯倚輶而鳴嗑桓何寶其琅琅駸肆語  
而靡著向何悟而趨下堂伊却勲之末圖胥何利乎錫  
土越石娛薪以相伴嬰何次驂而奄取平負郭而久貧  
何梯魏而康寓信鼓刀以周身何翼蕭而登輔節信疲  
於游宦何怵心於皇甫正平蹶於羈雌何銜能於文舉  
亮覘時而養晦蜀何奮之于剛畝蒙署籍而委質吳何  
抗之于卒旅蹇斯類之有徒殫筠素而曷叙被王公之  
宏略豈數子智謀之補畏遺德於冥鴻思灑恩乎施雨

向使失風雲之會構奇袤之伍或際立于草茅或殲危  
于俘虜亘天地以寂寥尚何流嘉風而建英矩者哉今  
茲有人遠陶聖世少齒鄉黌根英雲之節奏表畛域而  
墾耕躋陵隅之峻巖泳垠埃之淵渟若夫名山首乎黃  
老鬼谷譎乎縱橫桑羊役乎術計商鞅刻乎刑名姑還  
車而却步目吾肆之豐羸既披閩吳而僑貢未幾唱弟  
于天楹賦從軍兮南土天蓋五而回星莽萬端而外眩  
愚幽墨而無營憧百趾以高附愚遭環而後行嚙決辨

以旁肆愚抑閼而箱聲紛結游以走譽愚友益而盡傾  
親冒領而雙白又齊伐乎大庭第假田不足以羞旨烏  
敢斬外物而薦榮晞往躅而結援塊回穴而崢嶸介語  
默于蔀室其誰燭之而使明勾蘖芽于瘠壤又其誰育  
之而使成豈云病畦而謠笑哀絃而賣名然世主炎黃  
之化鼎建邠魏之風時乎時者難值旦復旦以親逢儻  
率道而自進立誠知命抑在乎其中亂曰善知人者豈  
古有之今無善求知者豈彼智而茲愚儻固其窳而厚

其薄必幽者縵而培者扶進抑時而退抑命爾其守約而于于者乎

季秋牡丹賦 有序

爽秋涉杪扶欄間有牡丹舊枿輒吐芳楨亭亭上擢  
發紅葩一大可徑咫尺角春取勝無聞然爾扶欄當彩  
翠亭之右亭屹縣圃之西北隅圃直縣堂之背縣介  
大江之南蓋漢元朔中江都易王上封其子敢為丹  
陽侯邑于蕪湖此其地歟今為太平州筦時河間凌

公尹之行再朞矣政休賦集又所瀕江英游雅故受  
署齋代被召將命者憧憧然率道其疆故觴詠之娛  
相因無缺及此珍卉罄茂公有異時之貴趣張具高  
會于其側所謂彩翠亭者酒三行濟陽蔡某醕舉而  
言曰公走文章聲二紀于茲顛葆幾華位不過禁省  
貳丞官不過萬戶長吏而善禦外物居頗休閒獨以  
浩博記書稱道聖明為事今是花也韜英和緒揭麗  
蕭辰時雖後而且大盛意者公其日寢亨會才慮將

有所讎乎昔騷人取香草美人以婉忠潔之士牡丹  
者抑其類歟請為公賦之其詞曰

朔羽南翔建杓西宅霜天一清露草皆白悲哉轉涼葉  
於亭臯兮悵穠華之閒寂均百草之不能秋兮何子花  
天姿之的的使人觀之若披大暑兮臨清湘剝層靈兮  
仰白日厥初槁壤潛春扶欄向夕芳枝舉以融怡絳蕊  
局兮晷歷寶霧霄籠鮮風曉拆麗或中去聲人香可專國  
刻紅炬以烘燄綴彤霞而薦色鬱弗誰語丰茸自持非

倚瑟之神女抑善賦之文姬俯清都而時下簸晴陽以  
孤嬉霄顙汗兮排金扉氣沉蕩兮張寶帷霓燐煜兮揭  
朱旗雲腫朧兮纁衣韞綠跗兮曠修眉姹鮮萼兮伸微  
辭沛怡愉兮新相知眇悽惻兮送將歸桃有援兮溪之  
曲蓮為媒兮澤之湄羌此物之善遠亶夫君之後時君  
不聞佳麗皇州喧繁戚里清籟迢迢名園疊疊綺櫳曉  
兮金鑷聲繡牆明兮雨苔紫嚴霰財歸光風半起於是  
萬蒂駢紅交柯結翠密顏紆餘斜袂輕綺文鴛羣飛霍



錦橫被綵蓋攀聯緹裳積委則有姝姝玉人翩翩卿子  
葆鷲過兮飛電珠憶來兮流水擁翫嘉辰笑語成市彼  
瓊甃美英縹葉新藹羞不得借其餘光矧標楊乎意氣  
今何為兮江之干地之卑兮歲將闌荆蕪比兮霜月寒  
望下苑兮思上蘭嘉本擢兮靈根盤泊淮波兮鮮楚山  
是知元治一陶昌生萬育無左右先游者淪乎朽株當  
匠伯不顧者被之散木譬此花之賦命兮亦節暮而葩  
獨然貴賤反衍禍福倚伏其暮也何遽不為貴其獨也

庸知不為福噫化工物情吾以花卜

慈竹賦

種植至多強名萬彙物拔其萃茲乃當天地之正氣有  
美竹兮特稟夫慈名而榮被豈有懷於本根兮何干干  
蓊然而環侍若夫吳郡名園王家新第遠閣斜欄橫塘  
靜水或薰風晝來或秋露宵墜日遲留兮簷外陰移人  
悽悄兮屏間籟起方且濯峭格而清舉足團樂之生意  
或翹而舉者若堂有高年兮勤素風而講議或亞而側

者若家有令子兮聞話言而沈思張如出門而事遠遊  
兮滋宿雨之清淚雍如奉卮而介眉壽兮羃春烟而怡  
醉紫芽蟠聯馨兒季穉去者奔追迎者嬉戲疎者如招  
並者如倚雖復貫千狀於巧筆曾莫形其放蕪借如秋  
晚霜重兮萬木林林而僵悴隴榆盡兮寒月高堤楓丹  
兮楚江紫此君也東藍田之苗玉刻炎州之稍翠固節  
虛心兮雖大鈞不能奪其志于是揖三荆於堂下結蔓  
藟於河涘襲氣同根之豆交驪承萼之棣顧威鳳之時

下亦孝烏之來寄設有用於律筩天聲發兮太和備觀  
此芳物悲哉遠人昔我從軍兮南之海濱今我辭家兮  
西遊洛塵暢然於舊國舊都感莊生之論恭止乎維桑  
與梓諷周傳之陳指白雲兮天遠採幽蘭而露新嗟碧  
鮮之得地乃叢茆莫保反而相親吾議爾德豈止乎千畝  
之渭濱當訂萬石之封君者也

傳

耿諫議傳

耿君傳字公弼以父廕為三班奉職思以吏治自奮更  
就銓選授河南伊陽縣尉明州司理叅軍表其能者數  
十人改將作監丞寶元元年知河南永寧縣明年三月  
旁邑人訛言相驚老幼東向奔走道路三日乃止前此  
澠池人有告其仇衛九思者傳張角之術善以妖幻惑  
人夜集鄉里男女同堂居寢逮明而罷號為講法率嘗  
往來旁郡數百千家相與為囊橐州縣吏更調情狀且  
捕之符文未成固已逸去以是積三十年不敢下其事

於縣縣吏度終無能捕之者因受賕不治至是民相驚擾咸意妖者唱之時宋宣獻公始泣河南乃以其事屬君且戒之即不得亦隨坐矣君請緩其期卒以計擒之索其家得所疏行賂簿書逮獄成首惡伏誅其支黨黥若杖男女二十餘人縣吏其得先所受賕抵罪流根株挂連一不窮問於是河南人交口稱之而姦賊吏益畏縮行恐被摘陰指峭刻君或知之自如也宣獻公薦其材就遷通判儀州事至復以材名關中又遷慶州朝廷

方議勒兵進討羌虜帥臣署君專督一道糧餉部分已  
次會寇入平涼遂出禦之諸將失利君亦遇害康定二  
年二月十三日也初寇至君以書與諸將謂宜少避其  
鋒擇據便地以量變動若徑往必墮賊計中諸將以遇  
寇不敢逗留且諭君以不與軍事宜還君曰死且忠志  
也吾不去矣既死軍中以其書聞慶州孔目官彭忠隨主帥任福在軍中收  
其書贈右諫議大夫官其子五人於是素所不相能者  
以聞始快心飾謗以君迫諸將進軍致敗無益而死於恩賞

為過厚今斷一指而得公相雖甚愚者不為被殊解支  
革是亦何願嗚呼孟子所謂捨生而就義者也在易大  
過之上六過涉滅頂凶無咎其說謂雖涉難過深而志  
在救時不害於義故不可咎也戾於浮言而中於大義  
夫何恨哉君姿狀魁毅少所為近俠晚益修厲詳知歷  
代史書語前古成敗事本末不忘作兵策數篇論攻守  
利害文辭甚壯而嫉惡鮮恕以智謀自喜負氣果勇不  
肯為人少下然屈之以理畏且從也



曹女傳

曹氏女建安郡人其父修古博學而文善議論外和內剛所至以直氣聞明道初以御史知雜事言事觸罪降工部員外郎知興化軍明年不召夏四月疾暴作一夕而終修古持已潔廉仰祿自足有餘則推之既死妻孥益貧殆無以奉其喪以還其屬吏民思之相與梓錢三十萬用資其歸拜酹堂下前白所以家人未及言女哭曰我先君居朝為聞人以清節自立不幸天不與年終

于貶所今臨財苟得尚何面目旦夕哭泣帷中幸趣持  
歸無吾先君累也吏民聞之慙罷明道二年女生之十  
六年先以父命配其里中人徐生未及歸而父没云

許迴傳

許迴字光遠歙人也歙於五代末屬偽唐士人偽唐尤  
以權利與服相夸迴獨好擊劍負氣以貧事其母不屈  
開寶七年王師伐金陵迴仲兄為光慶殿使分護北城  
迴亦以光慶殿承旨從焉外攻急矢雨下兄被重傷戒

迴曰我將死主矣汝歸慰吾親迴以身蔽之兄罵曰君  
親忠孝我與汝均有不可乎迴乃去明年金陵平例遷  
汴及兄為魏冠氏令部所部城州城有賊李潛號為強  
桀所過剽掠入冠氏問令在否曰令魏城下獨其弟迴  
在耳潛曰吾固聞許迴之為人即領徒去金惟岳以文  
詞名江南迴與之善惟岳嘗從後主弟朝京師俱留不  
遣當金陵平迴舉惟岳之族歸汴惟岳有子先因兵亂  
失其所之後迹知其為淝水鉅盜李某所俘以為己子

李日殺奪道上州縣莫能禁惟岳泣謂迴曰吾且死則誰收之唯公為能出吾子迴時在魏徑之淝水且至果遇盜二人遮刺迴曰李家若雄豪欲殺義士無所事刃盜驚止迴前泣曰汝所俘子吾兄弟子也吾聞義者哀人之急而勇者明已以信汝豈效草間無知輩耶盜迎舍迴厚飲食之還金氏子當是時迴以節勇聞而河北大官屢欲薦之於朝迴曰能寧浮游江淮不能就刀尺間以活遂終淮上年五十八有子會云



端明集卷三十二

謹案卷三十第一頁後七行結髮並進刊本並訛  
平據別本改

第三頁後四行為之典策刊本典訛英據別本改  
第十頁前一行治書見貺刊本貺訛貶據別本改  
第十三頁後六行承按行之多暇擁諸福以假寧  
刊本行下脫之字暇下衍固字又諸訛之並據  
別本增刪改

